

ist gegen dem Wieder/ so temperirt vnd mildert er die hitzige
dürre Kranckheit mit seiner Kälte vnd Feuchte. Diese Regel
ist gewiß in allen Zeichen / also daß je ein Zeichen mit glei-
cher Geschicklichkeit das ander stärcke / vnd dargegen je eines
das ander mit gegengeschicklichkeit ermildere / wie im erst ge-
meldten Exempel erzehlet.

XV.

Also auch hat die ander Tagezahl die vierzehende/ sein ei-
gen Urtheil. Deßhalben daß der Mon alsdann voll wird/ vnd
durch seine *opposition* eine starcke *influentz* hat.

XVI.

Eine jegliche Arzenei hat ihr eigen Zeichen / Zeit vnd
Unterscheid/ vnd dem ist also/ wenn der Mon ist im Wieder/
im Löwen oder Schützen / so sol der Arzt sich gebrauchen
der Arzenei/ welche den Menschen stärcken mit anziehender
Krafft. In der Jungfrauen vnd Stier/ Arzenei die da behelt.
In Zwillingen/ in der Wage/ vnd im Steinbocke Arzenei die
abderwet. Wenn aber der Mon im Wieder ist/ so gebrauch er
sich geruchs/ Gurgelschwencke/ vnd Arzenei die zu vnderung
oder vnwillen diene / vnd wenn der Mon im Stier / so mag er
Gurgelschwencke alleine gebrauchen. Wil denn der Arzt
Stulgänge machen/ so thue ers mit Getrâncke/ wenn der Mon
ist im Scorpion/ oder durch Latwergen/ wenn er im Krebse ist.
Vnd (wenn er wil) durch Pillen in Fischen. In Zwillingen vnd
Wassermann *triferam*, vnd stärckende Arzenei. In der Wage
oder Scorpion/ Crystirung.

XVII.

Wenn der Arzt purgiren wil/ so ist ihm von nöthen/
daß